

西  
南  
紀  
事

西南紀事卷三

餘姚邵廷采念魯撰 邵武徐 翰小勿校刊

何騰蛟

何騰蛟字雲從浙江山陰人其先戍貴州黎平衛因籍黎平中天啓元年辛酉科舉人崇禎中知南陽縣禦流寇有方畧復從巡撫陳必謙擊賊於安臯斬首四百由是知名累遷武庫主事備兵淮徐平土賊程肖宇王道善張方造等衆數萬南兵部尙書史可法奇其才十六年十月擢僉都御史巡撫湖廣時湖廣新經張獻忠之亂寧南侯左良

玉在武昌兵多無紀遠近患之大學士蔣德璟盛稱騰蛟  
威望爲左師憚服宜用之撫楚以可法遺部臣張伯鯨書  
爲證上初不聽吏部會推復以騰蛟上上思德璟言卒用  
之騰蛟自潯陽單舸之任諸鎮軍吏望風嚴戢福藩立進  
總督乙酉三月良玉聞李自成敗將出陝欲東避會王之  
明自燕來南都詐稱太子收下獄朝野洶洶言奸相馬士  
英絕先帝後良玉乘是與巡按黃澍上疏以誅士英爲名  
移檄遠近舉兵二十萬內向騰蛟萬端開說不聽左兵大  
掠城中城中人數萬避難走督署左兵從之騰蛟手尺刀

坐堂皇飛矢雨集不動良玉使人給曰吾欲見公一言公  
不行不彊遂挾登舟遽發至楊羅騰蛟罵曰吾封疆重臣  
豈相從作賊自投於江逆流數十里遇漁舟不列將卒稍  
稍來集家人完印至遂入大冶通山之間左兵惠下未十  
日闖賊十萬衆潰入楚掠漢武而東銜右兵尾

大清兵追闖者又數萬水陸踵至荆河至安慶數千里接陣格  
鬪紛拿散走四月良玉與黃得功戰大敗師潰蕪湖之荻  
港數日死子夢庚以全軍降於

大清軍前大清兵追賊急賊敗會大雨四十日百川漲溢所在

積尸成邱李自成引數騎馳入通城九官山行視安營地  
村民方耕不知爲自成羣起舉鋤擊之立死擲屍於水後  
騎至傳呼萬歲民始驚竄騰蛟獲其屍五月

大清兵畧定漢武屬邑騰蛟自寧州間道走瀏陽向長沙楚人  
相傳騰蛟入水浮沈二日夜不死大鼃負之登陸皆以爲  
神遠近爭附而騰蛟知時事不測先爲善後慮表知州章  
曠爲監軍道傅上瑞爲長沙道與督學道堵胤錫各練兵  
一萬至是皆會舊鎮馬進忠張先璧盧鼎等亦次第來歸  
長沙始立軍府乙酉唐王立騰蛟表聞自成敗死狀進尙

書兼東閣大學士封定興侯督師開府長沙胤錫曠分撫  
湖南北駐湘陰常德騰蛟言自成之死天誅非人力臣不  
敢冒上賞不許王在唐邸雅識南陽縣何令賢奏陳皆報  
可九月闖賊故將郝永忠王有才良玉標將王允成等皆  
來降得兵十餘萬李錦高一功等三十萬衆在松滋之草  
坪亦請降於胤錫湖南軍勢大振丙戌正月唐王次建寧  
騰蛟及贛州督師大學士楊廷麟皆遣使奉表迎乘輿手  
勅褒勞卒制於鄭芝龍不得出是年春騰蛟督郝永忠張  
先璧等攻岳州傅城大戰又戰於藤溪湘陰皆捷表加永

忠恢勦左將軍先璧右將軍江楚間民多結碧以應騰蛟  
喜冀大舉會福州破贛州亦不守兵不果出未幾

大清恭順王孔有德懷順王耿仲明智順王尙可喜與葛喇昂  
邦焦奈藍拜統滿漢軍南下度岳州兵勢甚銳騰蛟扼長  
沙遏其衝丁亥李成棟入梧州桂王至桂林遣使勞騰蛟  
且徵其兵騰蛟辭以方拒三王不得入衛桂王如全州初  
武岡參將劉承胤猛而虜常鑄鐵軍自隨號劉鐵棍崇禎  
福王間乘亂截粵饒十五萬選募軍馬遂雄視湖南桂平  
蠻將軍印岳州之戰承胤一軍先走抑其賞以是怨騰蛟

王在全州王珣爲主畫計召承  
公承胤始見王猶持正逐坤遣  
專橫杖御史毛壽登劉湘客劫  
還而是時騰蛟大軍在長沙湖南巡撫章曠督王有才王  
允成等兵二萬扼湘陰之新祥

大清兵相守一年不得進騰蛟又調廣西土鎮譚遇春率狼兵  
三千赴新祥至卽挑戰夜襲大營追奔二十里

大清兵退入岳州夏六月狼兵入長沙與有才軍士市肉相競  
變作三王長驅破湘陰入長沙諸軍皆潰董英首以瀏陽



降傅上瑞王允成皆降盧鼎郝永忠逃入山中騰蛟退守  
衡州尙可喜東渡江攻燕子窩總兵陳士明降畧定長沙  
諸縣還與有德仲明會於湘潭同攻衡州遇春帥潰兵入  
桂林索饒尋歸柳州騰蛟檄守道龍文明計執遇春送桂  
林斬之承胤欲因騰蛟敗解其兵柄請召騰蛟入輔諸鎮  
皆怒張先璧引兵向武岡請誅承胤會騰蛟至諭解之先  
璧掠寶慶西屯沅州騰蛟見王面奏情形檄調馬進忠袁  
崇第劉體純張光翠王有才李赤心高必正牛萬才十餘  
營可五十萬會衡州承胤終忌騰蛟計遏其事滇將趙

選胡一清言於騰蛟曰長沙失守非戰之罪乃自開門揖盜今各勦士馬如故望公出不啻雲霓若遲回不行恐動鎮解體騰蛟卽日陛辭承盾復以兵邀之從行者僅五百人一清單騎突前斬關而出進駐百牙橋衡州已破諸營四面皆不相聞騰蛟退守永州章曠疽發背卒東安永忠再出桂陽遇可喜自長甯來棄軍走道州總兵張學禮被執八月六日有德仲明覘諸帥首尾橫斷督師孤懸不足慮遂合各固山兵西破寶慶陳友隆力戰守紫陽河夜柵內火延火藥局兵遂潰

大清兵抵武岡王奔古泥承胤降進薄沅州先壁走游騎畧貴州界攻破黎平盡殺騰蛟之家還攻永州諸鎮皆散曹志建走鎮峽惟一清以死衛督師不去陳於城下力戰十餘日曰吾外援已絕內儲復匱死空城無益遂擁騰蛟決圍出比至全州永忠已集湖南潰兵入桂林城中沸恐騰蛟馳入與留守式耜部署自會城以北盡全州興安靈川駐永忠兵城東永寧義寧駐一清應選兵各給諸將分地乃定時王至柳州譚遇春子鳴珂叩駕言父冤從臣倉皇未詳其始末以不知對鳴珂怒帥諸苗攻龍文明大掠矢及

王舟王奔象州十一月王還桂林丁亥二月

大清兵破全州至興安永忠兵潰掠桂林而南王奔南甯騰蛟方按師永甯聞報急率一清應選兵入會城見留守式耜相持慟哭三月

大清兵薄桂林疑城中空虛直抵北門騰蛟督兵三面禦之大軍知有備遂渡甘棠去騰蛟列師榕江以保會城始靈川團兵殺滇營官頭北走既而歸復式耜持大體不更誅問及滇兵入境居人恐修怨挈妻子爭竄山谷騰蛟傳令不許一人隻騎下鄉均壁榕江軍民乃安是月馬進忠復常

德四月騰蛟收潰兵得二萬人復出桂林式耜遣焦璉從行

大清軍容甚盛以四部挑戰應選提五協兵爲中軍一清帥突將持戟當前隊叱咤撼山岳大兵退追至嚴關

大清兵堅壁不退各將猛戰僵屍橫關自午及酉將士溽暑枵腹請令收兵一清單刀獨殺至興安之二里橋諸將尾其後無不以一當百直抵興安騰蛟報式耜曰初六日嚴關大捷全陽馬到成功矣八日前至鳳凰坪

大清兵三路伏松林騰蛟麾兵四路接戰應選一清及王永祚

吳興朝馬養麟等十餘將往來馳突望之如在電火爐煙  
中周金湯熊朝佐沿山東下橫擊破陳而出橫屍如山驚  
橋水赤十六日攻全州

大清乘其師情來襲大戰橋東西甫接

大清兵退一清追至北關乘勝衝入城城頭矢石如注乃收兵  
五月十日

大清軍益募鈹手二十水陸出戰銳甚應選興朝迎擊斬其一  
將黃尙賢裹創疾戰不退騰蛟揮兵渡河以棒棒其左右  
翼勅騎乃退鈹手無一遺者十八日沿雲梯應選一清親

修敵樓焦璉分督裨將相視發砲砲無不中者十九日用古排柵法遏西北門專攻東南演營未至守排者兒戲

大清兵衝柵出各軍驚走騰蛟一馬在後不至於敗二十日立先登格千金蒲纓請登不克更發五鎮兵出東安斷永州水運勝於石期站林三鼎畧黃沙六塘絕其東南糧道俱報斬獲城中大懼二十六日應選督演營夜攻北關焦璉襲南關蒲纓攻西關平明

大清兵棄城退凡八戰五攻克復全州

大清兵還永州騰蛟上疏歸功式耜曰爲陛下以信臣用臣者

式耜一人也式耜亦寄托騰蛟無北顧憂使彈壓勳鎮以  
圖中興騰蛟督師四年所轄將士土客相雜諸大帥馬進  
忠等歷百戰不肯輕下郝永忠忠貞營又出盜賊雅性桀  
驁去止自任而騰蛟尉傳蕭然襪履敝垢幕臺身無僕媵  
務爲寬大優容平已恕物是以秦楚強悍之士咸就羈絡  
感其至誠不忍離去應選行軍有紀璉多籌運一清敢戰  
永祚少練纓熟伍法全州戰勝五人之力尤多焉是月金  
聲桓自歸於江西

大清三王聞變引還武昌其明月李成棟舉廣東來歸江南所



在響應屯聚山谷以待命騰蛟喜表達行在請聲桓成棟  
戰江右恢復南京而身自湖南取荆襄行朝軍國一委式  
相又請還蹕桂林以圖出楚皆報聞七月騰蛟在全州王  
命式相來稿師八月三王撤師還燕騰蛟圍永州城中援  
絕食人十一月朔永州兵遁凡攻圍三月始復曹志建部  
將譚國棟等追至冷水灘斬總兵余世忠擒道官林國棟  
是月馬進忠襲大兵於麻河斬首七千級二十年來戰功  
第一騰蛟亦克衡州抵長沙始李赤心與進忠有舊怨二  
王下長沙湖北巡撫肩錫走永定衛進忠赤心皆潰遁及

進忠既復常德繕城積粟收渠流亡爲攻守計盾錫出就之又密召赤心等來進忠怒焚常德趨湘潭盾錫赤心亦至大鎮屯聚者以十數人情惶惑騰蛟奏言湖北千里一空進忠赤心勢不相下恐變生不測且以數十萬衆共食湖南新定之地兵譁民盡土崩瓦解將在目前欲令進忠等分路立功亟請聖斷處分以彰畫一時金堡掌兵垣與中樞議令騰蛟督進忠及諸鎮圍長沙盾錫率忠貞營援南昌然忠貞營已縱掠長沙大亂趙應選胡一清焦璉曹志建等皆以爲響馬心不可測議棄衡州保老營騰蛟曰

事急矣非吾親往不可之湘潭以大義責赤心速出衡州  
皆拔營去

大清帥徐勇自長沙驟至勇故左良玉將耳騰蛟名聞道使人  
請附盾錫恥功不已出移軍他徙熊朝佐周金湯未集騰  
蛟孤軍在湘潭戊子正月烏金王至湘潭進忠一清俱奔  
潰騰蛟曉起營壁皆空南向慟哭曰臣五年督師心血嘔  
盡而所成竟如是豈非天乎緋衣坐堂上去烏金王延  
之上坐勸使降罵曰若不聞何騰蛟乎何惜一劍七日不  
食遇害且死謂寺僧曰取一粟河水飲我是水從衡來猶

吾君水也進忠前鋒將宣威伯楊某入城中求騰蛟凡七  
往返戰死諸將爲之奪氣由是并棄全州贈騰蛟中湘王  
諡忠烈時忠貞營援南昌者竟不進南掠永興郴州民人  
奔訴曹志建志建遣兵圍堵削錫于龍虎關面讓曰督師  
如我中湘王何帥統馭百萬絕不殘害百姓今盡瘁封疆  
香名萬載汝則臭名萬載也削錫夜半逃出關入廣西自  
騰蛟沒之明月李成棟金聲桓俱敗死又十有八月孔有  
德入桂林瞿式耜死之又三年李定國克桂林至湖南嘗  
歆獻謂軍吏使中湘王在瞿留守何遽至此令長衝郴永

間置祠歲時祀焉

論曰明末督師死事繫國存亡北有孫傅庭南有何騰蛟  
功雖不就義烈著矣議者謂傅庭能斬賀人龍立威信騰  
蛟仁柔短於控馭余意不然崇禎朝聲教雖微號爲一統  
奉辭杖鉞三軍之士承令股栗而騰蛟當江南離渙之後  
人懷二心輒爲去就威克厥愛有時不濟此亦各遭其世  
非獨騰蛟之不幸也金堡稱騰蛟布衣麻冠軍行攜二竹  
笥晚而患目疏草公移俱出口屬家眷百口寄鄧爲友隆  
所獻夫人嘗遣其子文瑞至粵王留之奪情拜都御史與

瞿式耜孫昌文同官於粵

堵胤錫

堵胤錫字仲緘江南宜興人父堵翁無子禱於三茅神夢請牧牛兒爲子及產字之曰牧子後自號牧遊生少落魄嗜酒亡賴好大言嘗爲萬言書抵大守自薦邊才欲北詣經畧熊廷弼大言曰熊公雖知兵非我佐之事且敗太守目笑之年三十餘舉孝廉崇禎丁丑成進士自以幼孤不及事父母奏持服三年廬於墓墓上枯桐載華蛛絲成孝字十四年知長沙府山賊蕭相宇擾安化靈鄉數敗官兵

率鄉勇破斬之又破醴陵燕子窩賊斬其渠草上飛於是  
中外稱知兵南都陞武昌兵巡副使改督學道乙酉春承  
督師何騰蛟檄募兵萬人使楊國棟等領之武漢旣失騰  
蛟退保長沙以盾錫巡撫湖北駐常德先是李自成死其  
義兒李錦等十八部號三十萬屯澧州界上遠近大震盾  
錫偵知錦母高氏有智畧軍事取決而高氏第一功所部  
二萬人爲諸軍最乃單騎走其營錦一功以戰騎數千來  
迎稱詔賜高氏命服二人蟒玉及金銀器皆躡躍叩首謝  
盾錫傳稿引卮論列教以臣忠子孝大義纏纏數千言囑

日高氏出拜呼錦曰公天人也汝曹不可負別部田見秀  
劉汝魁賀蘭李來亨等並繼謁受撫表聞閩中封高氏英  
淑夫人錦左軍侯賜名赤心一功右軍侯名必正餘皆侯  
號忠貞營加盾錫總督侍郎賜劍印丙戌二月忠貞營攻  
荊州旬有二日城且陷會大霧赤心等方蓐食忽救兵數  
萬至飛矢如雨南軍大潰盾錫急令楊國棟張光翠分守  
澧州回子河以通護忠貞營丁亥三月桂藩至武岡封盾  
錫光化伯不拜夏

大清師下湖南馬進忠王有才等俱走盾錫亦入永保諸土司



中朱容藩聞武岡敗自稱監國招討副元帥建行臺於夔州  
州盾錫泝三峽西上責以大義容藩愧悔去號盾錫乃還  
永定蜀中會師討容藩卒誅死戊子春金聲桓反江西大  
軍自長衡還保武昌盾錫傳檄諸鎮俱出湖南四月馬進  
忠下常德王有才下桃源澧州石門皆下忠貞營亦克荆  
門宜城告捷五月進忠兵戰於牛皮灘又戰於麻河俱勝  
大舉有日矣忠貞營故盜賊性不順約束且畏敵以荊州  
殘破欲引而南盾錫無勇往往好語羈縻之始自夔還約  
以騎三千赴常德助戰竟不至進忠既下常德晉封公赤

心乃請取長岳自効進忠惡之十月忠貞營自荆分道南渡高必正率輕騎數百突入常城進忠怒置酒爲宴陰具舟渡老營東去以騎兵自環注矢披甲出城走盡焚常城屋及灑江舡必正亦怒請北還脩錫不能制進忠遂掠益陽諸縣而東常德饑忠貞乏食脩錫乃以監軍毛壽登總兵楊國棟守常德自將標兵二萬及忠貞營東攻長沙不克引去會督師騰蛟於湘潭尋令脩錫率忠貞營援南昌忠貞道掠逗留已丑正月始至攸縣南昌已破騰蛟亦自湘潭被執羣議皆惡忠貞并咎脩錫脩錫遣堵正明尹具

瞻以五千人守永興陸士毅守安仁龔龍守攸縣自率萬人及胡一清之師守衡州三月戰於草橋兵敗走萊陽將趨永興軍永興安仁攸三鎮先潰正明士毅及待詔潘哲中書邵履正皆死之肩錫走郴州道遇

大清兵幾獲日午大霧夜螢火數萬從照之以故免晨夜兼行達桂陽鄞人曹志建以功封保昌伯有衆數萬屯桂陽地險而完忠貞營過之大掠志建恚謂故肩錫招撫因其至阻之籠虎關盡殺其將士廣西明經何圖復結寨楚粵界上肩錫使赴難得間道至賀縣志建擊殺圖復六月肩錫

至肇慶拜大學士在直三月時忠貞營已入廣西抄掠藤  
鬱兵民厭苦秋加胤錫督師兵部尙書使調護忠貞出嶺  
經畧湖南胤錫至梧州部下稍復來歸而期赤心等竟不  
至造其營詰之赤心初敗於郴戰馬鎧仗俱盡將卒疲無  
意北出更欲胤錫代請高雷休兵胤錫不可別部劉世俊  
劉國昌願出楚親至潯迎之他鎮遷延不至胤錫恚恨疾  
亟十一月廿六日舟泊潯江夜半遽索紙筆草遺疏復自  
題其像擲筆謂左右曰吾荷國重任不獲免胄赴鬪至斃  
命卧榻死誠餘恨豈若葬魚腹中洗此腸胃奮起欲自沈

於江從者力抱持之遂以是夜卒於舟子世明先數月死  
軍前赤心等或死或降竟無成後五六年友人魯釗南求  
遺骸不得得題像以歸曰吁嗟牧子遭家不造誠身事親  
遭時多難誠身事君四十九年孤兒逋臣聞者哀之釗字  
桐聲亦狂士盾錫未第時與交如釗輩凡十人號十鈍或  
曰十遁亦號十癡甲申之變散去多不知所終惟釗存  
論曰明世士大夫才之不稱其志者皆是矣未可以獨責  
盾錫竊怪闖獻二賊同屋明社洎乎末路遊魂惴息卒復  
依命來朝然定國能自拔於汙濁而自成之部無有聞者

豈天種其才以揚亂斲則有餘資廓情則不足乎抑重臣  
有如宗澤其人出而紀綱之其悍桀固亦可用哉

西南紀事卷四

餘姚邵廷采念魯撰 邵武徐 幹小勿校刊

瞿式耜

瞿式耜字起田蘇州常熟人景淳之孫也父汝說官部郎時嘗抗內監知名當世累遷叅政式耜少有才譽萬曆丙辰成進士知永豐崇禎元年戊辰擢戶科給事中是時魏忠賢新敗其黨阮大鍼楊維垣等猶陰結朝士幾幸投閒以復東林之禍縉紳上章多用王安楊左崔魏爲對案清議搖惑流品雜進上雖精明未能盡釐式耜意憤惋疏陳

六不平畧曰張差一案以風顛二字抹之乃慈寧召見劉光復詞涉唐突以致幽囚今追錄其忠贈卹葬祭而赤心調護東宮之王之案無望贈卹復官藁葬城外臣所謂不平者一也紅丸一案聖躬委頓豈臣子嘗試邀功之日崔文昇李可灼優旨放歸彼嫉惡防奸之孫慎行尙推敲啓事而可灼登訪冊與廢棄諸賢並列臣所謂不平者二也移宮一案楊漣左光斗防微杜漸以擁護先帝爲心賈繼春之持論自是移宮後處分今漣幸有擊璫二十四罪之疏贈卹從優果如諸臣一偏之見不將與之案慎行同其



沈抑乎臣所謂不平者三也封疆爲重熊廷弼梟首西市  
傳示九邊而三路喪師之楊鎬與擅離汎地之王化貞竟  
逍遙福堂且有以化貞登薦牘者人皆知廷弼以門戶殺  
非以封疆殺何以嚴邊臣失事之禁臣所謂不平者四也  
楊左羽翼先帝於倥偬之中大權不至旁竊宗社安於泰  
山非與王安有交結之情如崔呈秀黨附魏忠賢爲不解  
之誼也今動以王楊崔魏爲對案無論楊不可與崔對卽  
王亦豈可與魏對一腔忠義蒙此惡名臣所謂不平者五  
也五虎輩雖罪未盡法贓未籍沒然旣顯暴於天下彼甘

作乾兒造意主謀無毒不具之魏廣微固寵逐羶無醜不備之顧秉謙其他馬全田立極等或媚璫而反取憎或璫敗而猶彌縫乃死不僂屍生不穢奪何以爲大臣黨閹戒臣所謂不平者六也疏入報聞後坐其師錢謙益詞連下詔獄免歸終威宗時不見用福王卽位起原官唐王立擢僉都御史巡撫廣西時靖江王亨嘉稱帝於桂林用楊國威等爲將舉兵欲東使人至梧州召式耜式耜密告總制丁魁楚思恩叅將陳邦傅來援未至而梧州破令式耜易朝服朝脅以兵不可乃囚式耜逼廣東魁楚擊敗之還走

桂林圍之式耜授計國威旗鼓焦璉使圖國威邦傅亦至  
遂克桂林獲亨嘉致福省廢爲庶人幽死棄國威及其給  
事中顧奕等於市唐王封魁楚平粵伯邦傅思恩伯進式  
耜兵部侍郎副都御史桂王卽位進吏部尙書兼東閣大  
學士首疏言草昧之初宜養聖德修紀綱慎號令挽人心  
布威武起用人望招徠賢俊爲首務王虛已聽會唐王聿  
鑄稱帝廣州遣兵爭三水式耜督師出禦總督林佳鼎輕  
進遇東兵於海口東兵皆大艦乘東南風縱火矢砲焚西  
舟西兵登岸淖深三尺人馬俱陷佳鼎死李明忠僅以數

十騎免王奔梧州已知閣部師全再下肇慶王爲人仁柔少斷無雄視經畧之意動止循家人小節聞於知人初正位號南中兩粵湖南滇黔西蜀均隸版籍舊臣呂大器李永茂等先後繼至兵食粗足文武畧備而王及太后王氏皆畏苦軍國冀得無事小逸始議不欲監國強而後立粹聞風鶴追咎臣下式耜等深以爲憂太監王坤旣亂北政復自南都走閩奉使在粵王與語說之入掌司禮監由是內批四出羣小進用首斥諫官劉湘客等大器永茂皆告去式耜爭之不得李成棟入廣州殺唐王及蘇觀生行朝

震恐式耜議扼峽口決戰坤固請西遊

大清順治三年丙戌正月王再至梧州肇慶遂破復發梧州趨府江於是百官奔散丁魁楚走岑溪王化澄走潯州晏日曙田芳等走博白獨式耜及方以智吳貞毓吳其鵬程源馬吉翔等十餘人從行成棟進攻梧州巡撫曹變出降二月王至桂林式耜肅殿陛敕守禦誕告楚蜀各鎮以朝廷所在薦賢才之可達桂林者王錫袞文安之爲相周堪廣郭都賢劉遠生爲六卿丁時魁金堡爲給事皆召用惟錫袞安之以滇蜀道阻未至進何騰蛟閣學督師倉卒布畫

皆有體要兵氣再振行朝始尊未幾丁魁楚沒於藤江遂  
陷平樂桂林震動王坤又議走武岡式耜見王泣曰臣本  
以桂林起事願與同存亡况東粵既失所存惟此一隅棄  
之入楚百武岡何益我退一步則人亦退一步我去速一  
日人來亦速一日半年之內三四播遷軍民瓦解何以爲  
國不聽乃自請留守桂林駕暫駐全州以扼楚粵之中詔  
封焦璉富川伯隸式耜麾下同守會城加陳邦傳爲侯守  
昭平三月

大清兵圍桂林衝入文昌門焦璉自行在方至從數人控弦提

刃接戰卻敵

大清兵屯陽朔城外俱降式耜與璉危城孤守劉承允兵至式耜括庫藏夫人邵捐簪珥以犒終不肯出戰卒與焦璉兵鬪大掠而去五月桂林積雨城壞大兵四面肉薄急攻焦璉負創奮臂往來馳救呼督師撫按分門守用西洋銃擊其騎卒尋出城大戰自辰抵午士皆致死明日復戰大兵引退會陳子壯張家玉陳邦彥等起兵攻廣州以救桂林於是成棟解而東遂復陽朔桂林被圍三月外抗大兵內防亂卒式耜一手指揮乃得底定焦璉久將桂得桂人心

式耜國士遇之故獨得璉死力論功進式耜太子太傅封  
臨桂伯表讓不許請告自劾言自二月十五至五月二十  
九此百六日中遇患者三皆極危險變故當前總辦一死  
字亦遂不生恐怖不起愁煩惟是臣之病不獨在身而在  
心不徒在形而在神身與形之病可療也心與神之病不  
可醫也時王在位一年未有令聞王坤去後周鼎瀚馬吉  
翔更進用事行在大權一歸劉承允式耜憂國故以疾喻  
又請還蹕全陽不報七月焦璉復平樂陳邦傅復梧州式  
耜表賀粵西全定大駕早還桂林昭告興陵王心知式耜



忠制於承允不能行八月

大清孔有德入寶慶遂襲武岡承胤迎降商邱伯侯性遣兵赴  
難王自古泥入柳州式相疏言乘輿不可他移一步滇黔  
荒靖忠義心渙三百年土地僅留粵西一綫且山川險巽  
兵馬糗糧俱有可恃惟陛下堅守無爲羣議搖惑以繫天  
下興復之望會永州郴州破潰兵入桂林者數萬督師何  
騰蛟新輔嚴起恆俱至式相修甲兵營芻穀促騰蛟再出  
全州集郝永忠焦璉等要言於神期以同憂國事皆嘆位  
稟令其冬陳邦彥張家玉陳子壯俱敗沒式相聞之爲位

東向而哭十一月王還桂林式耜與起恆並相中外相慶  
順治五年戊子二月郝永忠兵潰於興安馳至闕下大掠  
王欲西走式耜力爭謂督師警報未至營中夜驚無大恐  
衆意不能止式耜曰果不得已俟督師歸咫尺威嚴士氣  
百倍若以走爲策桂危柳益危來師今日可至桂明日亦  
可至南太反覆數百言起恆亦勸王宜鎮以安靜如出恐  
桂城遂難保事且不測俱不聽夜半王如南甯起恆從夜  
潰兵四掠職官無一得免式耜傷足被逼登舟遇劉遠生  
丁時魁劉湘客於樟木港乃入民舍草檄分路四發暫駐

陽朔召焦璉於平樂入援湖南將周金湯熊朝佐亦至檄  
簡討蔡之俊先入城宣式耜令僉事邵之驛部署璉兵人  
情始定何騰蛟自永寧馳回集胡一清趙應選等數千人  
入守三月

大清兵至桂林式耜及騰蛟出禦退之加少師賜精忠貫日金  
章璉等皆進爵式耜念南寧蠻鄉非駐驛所日爲迎駕計  
以

大清兵尙在興安與騰蛟且戰且守謀復全州以恢湖南式耜  
爲相持大體雖際喪亂動引古義如立治朝多所匡正廣

西巡撫魯可藻自署兩廣故例東撫稱制兼廣西西撫稱  
撫式耜曰方今武人多自署撫軍帥一面帝制輒自命貽  
遠人笑予代疏請御遏不可周鼎瀚以閣部擅竊式耜疏  
正之武岡之亂言官彈鼎瀚以附承允入直式耜票擬獨  
不苟曰王沂公言進賢退不肖皆有體瀚係大臣應聽自  
免陳邦傅據潯梧自稱世守不上供式耜疏駁之曰今日  
功晉五等尙未裂土且海宇浚剝假粵西一隅爲郊畿百  
官六師於是取給輒曰世守豈老成憂國之心哉式耜雖  
在外朝廷之事未嘗不極言力請疏曰臣與陛下患難相

隨休戚與共原自不同於諸臣一切大政自得與聞廟議  
可否國勢所關本亂而求未治不可得也又念行在久無  
講官經筵不御石室塵封何由聞得失因手書八箴於扇  
進之是年春金聲桓以南昌歸孔有德等退軍武昌夏騰  
蛟復全州李成棟亦以廣東來歸奉表迎乘輿江南響應  
式耜上疏言行在大政履端謹始不可不慎臣謂廣東軍  
功爵賞文武署置一歸成棟不宜更易且楚黔雄師百萬  
騰蛟翹首威靈如望雲霓大駕遽東軍中將吏必謂朝廷  
樂新復之土成棟亦有邀駕之嫌號令既遙事機便異請

一見東諸侯俾共瞻至尊音容面爲慰勞指屬然後責其盡意於東揣勢量情柔遠能邇道無過此王欲東式耜再請還桂林以圖出楚不報會聞吳貞毓勸王幸廣州式耜急使劉遠生入見阻之成棟自嶺還修行宮且邀駕遠生奉使至廣謂成棟曰今駕駐此爵賞征伐人疑有私不可不嫌成棟乃止八月王至肇慶成棟陛見首言式耜擁戴元臣不宜久勞疆場請召還綸扉以資啓沃王遣官三四輩召式耜式耜念身在西省則東朝重且時事遽難逆覩安危之機在外不在內辭不赴時五嶺道通朝士輻至李

元增袁彭年新自東來與劉湘客金堡等一見輒契期以  
肅清綱紀培植善類相勵權幸多不便陳邦傳與成棟爭  
寵未幾又召何吾驍黃士俊入閣祖用敝政更置臺諫行  
朝驚然水火日深而式耜以度量包容公忠調護舊人新  
附皆倚爲重成棟戰亦不利順治六年正月何騰蛟李成  
棟金聲桓俱敗死王命式耜代騰蛟總督川湖滇廣軍馬  
賜敕有曰得卿在桂朕無西顧湖南進止惟任便宜未幾  
衡永皆破趙應選胡一清潰入廣西式耜請以兵科給事  
中吳其靄監諸營軍再出屢疏勸王以歲月稍暇財力優

裕宜一心并力修內治以自固嚴外備以自強且積弊之  
後易致振興也一才一藝之士靡不收羅幕府每慨人才  
凋零殆盡凡跼足而至者非懷忠抱義之人亦亂世取功  
名之士人之精神歲月不用之於正則用之於邪安可驅  
爲人用故人咸以桂林爲稷下七月式耜遣胡一清出屯  
全州順治七年正月尙可喜入南雄韶州肇慶大震王欲  
出奔式耜馳奏言粵東水多於山不利騎戰自成棟歸順  
始有寧宇財賦繁盛十倍粵西騎士材官南北相雜中興  
根本難得易失且韶去肇數百里強弩乘城亦可堅守以



待勤王今遂棄之悔可及乎不聽如梧州可喜遂圍廣州  
二月黨人獄起金堡丁時魁蒙正發劉湘客下錦衣衛式  
耜奏言倣擾之時宜保元氣勿濫刑詔獄追贓乃熹廟朝  
魏忠賢竊權鍛鍊楊左事何可祖而行之勅班四人罪狀  
示式耜式耜封還勅書言法者天下之至公不可以蜚語  
橫加考案且四人得罪各有本末臣在政府不言恐失遠  
近人望其何辭於後世凡七疏始改命三法司久乃論成  
秋孫可望襲據貴州十月孔有德破鎮峽曹志建潰式耜  
遣起恆書曰今東疆危迫天下事大都不可爲吾與公身

爲重臣遭時板蕩不能拯救徒以一死塞責何面目以見天下士起恆奉書而泣十一月二日廣州陷五日孔有德入嚴關桂林城中大亂潰兵四掠式耜衣冠危坐署中時張居正曾孫同做爲兵部侍郎監一清軍於靈川聞變南奔曰安可使留守獨殉社稷自江東泅水至直入式耜寓曰事迫矣公將奈何曰今日是式耜死日但陷封疆負國死悔恨耳同做曰君恩師誼做當共之詰旦城陷被執有德諭使降式耜不應同做大罵白梃擊兩臂折牽出共幽

一所

大清軍壯其義間餽酒食同敵縱飲和詩歌題牆壁俱滿閨十

一月十七日遇害桂人哀號載道初金堡戍清浪阻兵止於桂林爲僧至是遣僧義持書上有德請收葬式相同敵畧曰故督師大學士瞿公總督學士張公皆山僧之友也已爲王所殺可謂得死所矣敵國之人勢不並存忠臣義士殺之而後成名兩人豈有遺憾於王卽山僧亦豈有所私痛惜於兩公哉然聞遺骸未殯心竊惑之古之成大業者表揚忠節如出天性殺其身而敬且愛其人若唐高祖之於堯君素周世宗之於劉仁贍是也我太祖之下金陵

於元御史福壽既葬之矣復立祠以祀之其子犯法當死  
又曲法以赦之盛德美名於今爲烈至如元世祖祭文天  
祥伯顏卹汪立信之家豈非與其植桑倫者耶山僧間嘗  
論之衰國之忠臣與開國之功臣皆受命於天同分砥柱  
乾坤之任天下無功臣則世道不平天下無忠臣則人心  
不正事雖殊軌道實同源兩公一死之重豈輕於百戰之  
勳者哉請具衣冠爲兩公殮瞿公幼子尤宜存卹張公無  
嗣益可哀矜並當擇付親知歸喪故里則仁義之譽王且  
播於無窮矣如其不爾亦許山僧領屍隨緣藁葬揆之情

理亦未相妨豈可視忠義之士如盜賊寇讐然必滅其身  
狼籍其支體而後快於心耶書未上吳江楊藝衣衰絰挂  
冥錢衣上號哭於市見文武將吏叩頭請收葬凡兩日見  
聞者爲泣下令備棺衾殮藝見義索堡書觀之曰傳世文  
也然吾已得請更上書恐生事若但同我殮兩公於義盡  
矣并瘞北門之園王贈式耜粵國公謚文忠同做江陵伯  
謚文烈桂林旣破而陳邦傳叛以潯梧降尙可喜耿繼茂  
亦畧定高廉雷瓊兩廣俱破嚴起恆從王入南寧爲孫可  
望所殺又八年王入緬又二年吳三桂執王去害於雲南

距式耜之死年十三矣

論曰聞之長老唐桂之際相國死義者非一而虞山瞿公爲最以南都全盛文武在位畫江自守僅乃一年方馬百戰精旅望風降附視去其君如塵垢瞿公名爲留守身無見兵徒以忠義激厲二三羈縻強悍之士困守孤城餉絕援窮人無怨叛力竭而死公何憾哉張司馬別山斷臂不屈無忝前人金堡稱其有過人之才氣良然

嚴起恆

嚴起恆字震生一字秋冶浙江山陰人從父誼官京衛舉

順天鄉試崇禎辛未成進士授刑部郎恤刑廣東多所平  
反擢知廣州府餽遺卻絕有自粵西載乳石峯如玉筍者  
三以獻起恆列之堦前署其堂曰留石及遷斬黃監司石  
留廣州由是清節大著壬午移上湖南道京師陷歸紹興  
福王時移衡永守道南都破罷居南甯桂王卽位肇慶知  
起恆名擢太僕卿尋晉戶侍郎召赴行在改兵侍郎陞戶  
部尙書再晉吏部尙書

大清順治四年丁亥八月王在武岡晉內閣大學士加太師十

一月王還桂林起恆與瞿式耜同輔政戊子二月

大清兵襲郝永忠於興安王幸南寧以起恆從李成棟反正又從王至肇慶孫可望求封親王起恆持不可陳邦傅等竟矯詔封可望爲秦王可望以故深恨起恆庚寅二月尙可喜園廣州王奔梧州黨人獄起金堡丁時魁蒙正發劉湘咨下錦衣衛拷問血肉狼籍中書舍人管嗣襄衡州舉人王夫之謁起恆曰國勢如此而作如此事奈天下後世何起恆曰吾亦寃之然無可如何也嗣襄曰誰秉國鈞而令至是相公不可爲此言起恆瞿然索衣冠請對不得入率諸臣伏沙灘求免刑式紹及勦鎮各疏申救堡等卒得不



死起恆亦罷相居平浪頃之王用李元胤請手敕召起恆  
復入直其冬廣州桂林破王奔南甯起恆從辛卯二月孫  
可望遣步將賀九儀以兵入衛詣起恆舟所白事陰掣舵  
牙擊起恆入水左右莫敢救後三旬有青山漁人集網見  
虎從水次負一冠服人上山譁然登岸相逐虎置其人去  
冠服不敗面如生舉人杭思齋來視固起恆也密聞於朝  
葬青山陰賜鑑湖先生號立石可望逆形旣著王追思起  
恆賜諡忠靖死時年五十二後十四年子文馴走葬所求  
三日夜不得傍徨哀慟有老父引至識之忽失其人遂改

葬桂林文馴奉母居廣西

論曰起恆雖罕濟變才然居官清事主忠遭際末造行已持論確守其素使武夫悍將見而心下要亦不易論者記兩粵存亡以瞿嚴並稱又言其儀表魁梧想見隆萬盛世相臣之度遭時不造先後致志悲哉

西南紀事卷四

西南紀事卷五

餘姚邵廷采念魯撰 邵武徐 翰小勿校刊

陳子壯

陳子壯字秋濤廣東南海人萬曆己未進士第三人授編修天啓中父熙昌爲給事中論魏忠賢杖戍子壯亦以典浙江鄉試試錄語誹謗坐黜崇禎初官禮部侍郎糾唐王不法事又議宗室不宜授官下獄戍

大清順治二年乙酉春福王起子壯禮部尚書忤馬士英歸五

月南都敗桂恭王寓梧州子壯議以王神宗子光宗弟宜

嗣大統總制丁魁楚巡撫瞿式耜等皆是之唐王立乃已  
王敷求舊德徵子壯入閣子壯以閩事制在鄭芝龍辭不  
赴而香山何吾驕應召復相丙戌秋王奔汀至上杭之白  
蓮

大清兵追及吾驕走王倉皇馳不知所終吾驕竟歸香山是時  
僉都御史張家玉將粵兵數萬將出江西聞上杭敗潰歸  
東莞桂王由棖監國肇慶聞子壯先王時議卽家拜大學  
士太保兵部尙書節制江廣閩楚軍務會唐王聿錫至廣  
州未果行

張家玉

張家玉號芷園廣東東莞人崇禎癸未進士庶吉士李自成陷京師家玉罵賊被縛賊愛其美秀而辨釋之家玉爲文譽賊乘間南走馬士英方與東林構難以家玉爲周鳳翔門人羅織削籍居錢塘與同邑副使蘇觀生等護唐王入閩唐王立爲侍講見政決鄭氏請出效死行間命兼兵科給事中監永勝伯鄭彩軍先驅抵廣信解撫州圍觀生視師南安丙戌正月

大清兵圍家玉於新城力戰得出加僉都御史尋與彩議不合

請回粵召募兵方集閩敗報至遂潰冬十月贛州破觀生棄南安還保廣州陳邦彥諫不聽

大清將李成棟畧定漳泉將窺惠潮兩粵大震

陳邦彥

陳邦彥字會斌廣東順德人崇禎十七年聞都城陷慟哭走南京上中興政要書萬七千言不報唐王入閩得其草於蘇觀生日奇才也召爲監紀推官詔至而邦彥舉於鄉改職方主事監狼粵兵駐南安數爲觀生圖計不能用及唐王事敗觀生欲度嶺議所立邦彥曰國自有主非閣下

所急今

大清軍全力在閩宜注意東備疾走惠潮因漳泉未潰以控扼之猶可及也若以擁立爲功動淹時月待敵度關而行此土崩之勢難與守矣邦彥請留一軍爲閣下固鎖北門效死以之南安士民遮道請邦彥共守不許遂全軍入廣州時丁魁楚已奉桂王監國觀生故與魁楚隙不憚邦彥引義力爭乃遣邦彥奉表勸進且迎駕已行而唐王聿錡至觀生意變邦彥至梧聞聿錡立頓足曰是尋蹤譚尙亡不日矣告魁楚及都督侯性請王速詣肇慶早正大位屬人

心擢邦彥兵科給事中賚敕還諭觀生觀生頗不安欲約和會西撫林佳鼎與廣州總兵林察戰沒觀生意又變邦彥乃變姓名逃入高明山中十二月李成棟破廣州聿鏘及觀生自殺遺臣子壯等亡匿山谷北撫佟養甲使人召家玉不至土人余龍聚衆二萬屯甘竹灘潰軍亡將多往依焉丁亥春成棟畧定廣東諸郡王棄肇慶西奔魁楚敗死遂破肇慶梧州平樂圍桂林瞿式耜焦璉悉力守禦幾陷者再邦彥出自山中晝夜泣念禁旅單弱而湖南疎遠猝不得入援獨乘其未定得奇兵徑襲廣州此孫臏所以



救趙也會東筦焦麗到濬二鄉結保害大軍數百人其渠  
何不凡莫子元迎家玉入居東筦邦彥單舸赴甘竹灘說  
余龍乘虛攻會城龍帥舟數百道海遇大舟百餘舶於東  
筦焚之遂薄廣州城中民夜掠食且盡養甲遣騎急報成  
棟揚言便道徑取甘竹龍懼引退成棟解圍東桂林得完  
於是邦彥起兵高明三月成棟陷東筦家玉斂軍到濬到  
濬陷家玉祖母陳母黎妹石寶俱赴水死妻彭被執不屈  
斷支體殺舉人韓如璜家玉走西鄉大豪陳文豹聚鄉兵  
奉家玉進克新安邦彥遺家玉書曰成不成天也但得牽

制北騎數月無西則潯梧之間可完葺是我不收功於東  
收功於西也成棟自是不能復西家玉使張元瑩奏事桂  
王加兵部尙書提督嶺東軍務右副都御史而邦彥遣門  
人馬應房與余龍攻順德成棟至順德龍敗應房被執赴  
水死四月龍再戰死黃連江邦彥棄高明收敗卒別徇江  
門下之勢復振養甲得降人知前攻會城謀出邦彥患之  
使數十騎掩其家龍山獲妾何氏子和尹虞尹爲書招邦  
彥不答判其尾曰妾辱之子殺之身爲死臣義不私妻子  
也養甲猶厚待之會郡紳李星一舉人杜璜起兵攻肇慶

遂殺邦彥家屬璜等亦死

大清兵攻西鄉不克家玉遣兵入東筦戰於赤岡五月復攻東筦不利退保西鄉成棟攻圍數日家玉走西鄉隨破陳文豹等俱見殺家玉至鐵岡得姚金之陳穀子等三千人攻龍門入居之進克博羅及連平長寧攻惠州不克克歸善還屯博羅

大清兵來攻退走龍門家玉爲人有奇氣少好劍術多結山澤之豪顧盼自喜以故蹶而復起所至翕然時粵東起兵殉節甲於他省以家玉邦彥子壯稱首自耕夫女子至於軍

伍盜賊無不識二人名字邦彥沈練家玉英果其人皆出  
子壯上子壯老臣秉直道不苟立議論爲去就朝野瞻望  
於家玉邦彥父行兩人倚爲重家玉在龍門分兵列龍虎  
犀象四營進攻增城入之所在鄉兵特起故虎賁將軍王  
興屯新會之文村高涼崔良楨潮陽賴其肖等先後聚衆  
攻克州縣夏六月子壯起於南海之九江邦彥來會是時  
成棟方東擊家玉會城虛故指揮楊可觀楊景曄及子壯  
壻前知州梁若衡等結花山降盜三千人謀召子壯定約  
子壯攻西南邦彥攻東北以七月七日城中三鼓俱發子

壯意喜謂廣城且唾手得遂先二日薄城家人盛服至城下張檄被執可觀方與景暉計事聞子壯攻城驚曰死也奈何必泄矣語畢捕去養甲使引餘人可觀怒曰今日丈夫斫頭耳終不緩一死殺天下英雄也並遇害花山人皆死子壯駐五羊驛邦彥後至曰公無再誤今成棟必還救我伏禺珠葦間火之公大艦嚴陣待其西成棟敗城必下矣計定成棟過禺珠洲勢甚盛邦彥火舟少衝之焚其數舟成棟引而西邦彥尾之平明迫子壯軍子壯軍不知邦彥至望帆檣蔽空上以爲皆北舟陣動子壯倉卒傳令不

及後軍拔船先走成棟因擊之遂大敗子壯退保九江邦  
彥乃收兵攻城城中揭可觀景暉首邦彥哭祭之知事不  
濟退破三水會總兵霍師連於胥江前御史麥而炫復高  
明以迎子壯湖南道黃公輔御史連城璧亦攻下新會新  
寧八月清遠指揮白嘗燦殺知縣何甲迎邦彥邦彥以清  
遠廣州咽喉引兵赴之因橫江樹柵絕嶺東餉道九月成  
棟水陸二萬爭清遠會北風起師連以火舟出柵大戰成  
棟敗走悉舟追之風忽反成棟還戰師連舟迫柵不得入  
遂潰師連死精銳盡喪成棟進攻城邦彥嘗燦與大學士

宋學熙嬰城守十日不拔乃穴城及城實以火器戰酣城崩十餘丈嘗燦死城陷學熙自縊邦彥猶率數十人巷戰自辰及午肩受三刃走學熙園亭題詩於壁赴池水牽出致廣州使作書招子壯邦彥曰陳督師誓扶弱主比之邦彥未敗時有一日則盡臣子一日之責邦彥有死不能爲此也養甲使醫視創膳夫進食並笑卻之九月二十八日磔於市年四十五臨命歌曰天造兮多艱臣也江之澚書生謾談兵時哉不我與我后兮何之我躬兮獨苦厓山多忠魂後先照千古肝忽躍起擊監者面驚怖數日死始邦

彥在三水欲練兵足餉大舉倉卒赴清遠布畫未定又大  
風忽反天敗霍師連故速卽於難子恭尹走增城父友湛  
粹破千金匿之十月成棟馬步萬餘至增城家玉緣溪設  
險分兵爲二以自救成棟令杜永和闔可義分攻之大戰  
十日力盡而敗或請潰圍去家玉曰矢盡礮裂欲戰無具  
將傷卒死欲戰無人丈夫立天常犯大難事勢已去烏用  
徘徊不決坐待執縛以頸血濺敵乎哉起徧拜諸將自投  
野塘中死年三十三先後從家玉死者師林游從弟有光  
有恒及鄧棟材韓如球楊如遠等數十人父兆龍弟家珍



爲人竊匿得免於是成棟專圖子壯十一月用四姓盜鄭  
昌等爲導破高明殺前知縣李實蓮執子壯及麥而炫送  
廣州養甲厚享子壯曰不處公極刑卽威不立以犯旗示  
之遂衣以赭舁遊城子壯被數十刃呼高皇帝烈皇帝不  
絕口而炫從死是日養甲召何吾騶王士俊李覺斯黃應  
華諸降紳聚觀舉酒屬曰諸公畏否皆鞠躬曰畏已改容  
託曰真忠臣真忠臣子壯男上圖被獲家僮伯卿請寸斬  
以贖主人之孤得免死戊子春贈子壯番禺侯謚文忠家  
玉增城侯謚文烈邦彥兵侍郎謚忠愍以家王之封封兆

龍家珍上圖恭尹皆贈錦衣官是年六月成棟以廣東歸  
吾鄉士俊復夤緣入內閣每朝會言及子壯未嘗不嘖嘆  
曰真忠臣真忠臣

論曰董先生瑒與恭尹交詢邦彥遺事言於書無不讀歲  
授經入以遺昆弟友戚之貧者動止稟庭訓縣令以百金  
聘典家塾父弗命往弗往也及得馮氏隨筆云邦彥固子  
壯門人信哉其家庭師友所受不苟然乎家玉神明英暢  
北都陷賊審權達節已名蓋天下使聲桓舉而揚萬存成  
棟歸而子壯家玉邦彥猶在事詎可量哉數人者殺身成

仁然國之元氣於斯盡矣

王興

王興廣東恩平人字電輝故虎賁將軍

大清順治四年丁亥春李成棟畧定廣東進逼桂林陳邦彥張家玉等各起兵攻復廣屬州縣興亦起兵新會新會有地曰文村在萬山中大海之濼接於新寧開平恩平陽江陽春連廣肇二郡六邑興以成棟兵盛未可輒克乃入居文村唐王弟聿鏜暨宗室皆往依興興奉之甚恭謹成棟來歸桂王至肇慶遣大理鄉連城壁賚詔勞興將移其兵度

嶺不果庚寅冬尙可喜入廣州十郡皆附獨文村不下累  
攻不能克遺臣亡將懷慕興義來附者益衆地旣阻險用  
桂王正朔服色以死自誓不臣於

大清乙未七月可喜大會水陸兵攻興入其境曲屈烏道刺竹  
叢立多陂塘騎不得馳短兵接戰數步一折皆失所長

大清將盛登科等二十餘人戰死可喜乃斷要道重壘塹溝明  
年八月文村食盡可喜惜興才復招興是時義烏金光爲  
平南掾有俠氣可喜非光言不從而故相王應華雅善光  
嘗爲小盜所得獻虎資營興客遇之令應華作書曰必得

金公綯

字光

手書來者歸款從之乃遣使賚敕印及子五人  
謁可喜可喜厚賚使人偕其使還報興終不出見是日宴  
其吏士諭以釋甲無貽害生靈夜分具衣冠舉家自焚事  
鏐亦吞片腦卒興又有幼子五人可喜並善待之是歲桂  
王入緬興以全滇俱破行在無主決意罷兵卒以身殉

西南紀事卷五